



Pomorsko društvo u Bosni i Hercegovini
Maritime Association in Bosnia and Herzegovina

KONFERENCIJA: Problem proglašenog suvereniteta Republike Hrvatske na pomorskoj teritoriji Bosne i Hercegovine (14.11.2019. – Hotel Holiday, Sarajevo)

ORGANIZATOR: Pomorsko društvo BiH

SAOPĆENJE ZA MEDIJE – POMORSKO DRUŠTVO BIH

Stručnjaci potvrdili: Republika Hrvatska ugrožava suverenitet BiH na njenoj pomorskoj teritoriji!

Danas je u Sarajevu održana tematska konferencija "Problem proglašenog suvereniteta Republike Hrvatske na pomorskoj teritoriji Bosne i Hercegovine" koja je okupila istaknute predstavnike zakonodavne i izvršne vlasti, akademske zajednice i organizacija civilnog društva.

"Na ovogodišnjoj konferenciji smo okupili istaknute predstavnike akademske zajednice koji su govorili o različitim temama vezanim za ovu problematiku. S jedne strane smo razmatrali pravno-političke aspekte međunarodnog sporenja BiH i Republike Hrvatske na Jadranskom moru, a s druge sve elemente društvenog i ekonomskog značaja Jadranskog mora za Bosnu i Hercegovinu. Predavači su bili prof. dr. Larisa Velić, prof. dr. Hanka Vajzović, prof. dr. Enis Omerović, doc. dr. Mirza Čaušević, prof. dr. Muriz Spahić, prof. dr. Munir Jahić, prof. dr. Kasim Tatić, Zoran Bibanović i Nedžad Ajanović. Izuzetno je važno da se okupljamo oko ove teme i argumentovano zagovarano zaštitu suvereniteta i teritorijalnog integriteta Bosne i Hercegovine", kazao je dr. sc. Izet Bajrambašić, predsjednik Pomorskog društva Bosne i Hercegovine.

Kako su organizatori naglasili, cilj Konferencije je upoznati javnost sa dugogodišnjim problemom proglašenog suvereniteta Republike Hrvatske na pomorskoj teritoriji Bosne i Hercegovine, a posebno sa mogućim načinima rješavanja trenutnog stanja.

"Ono što je akademska zajednica jasno potvrdila jeste da Republika Hrvatska nedvojbeno ugrožava suverenitet BiH na njenoj pomorskoj teritoriji. Posebno bih tu istakao važnost da sa današnje Konferencije ne odlazimo sa opštim zaključcima, već su predavači ponudili 'mapu puta' ka rješavanju problema suvereniteta, pomorskog razgraničenja kao i pitanja koridora za slobodni pristup Bosne i Hercegovine otvorenom moru. Samo kroz konstruktivni i naučni pristup, te okupljanje ljudi koji razumiju prilike u međunarodnim odnosima, može donijeti rezultate i promjenu trenutnog stanja. Vjerujem da smo to današnjom konferencijom postigli", zaključio je Bajrambašić.